

علوم اقتصادیه و اجتماعیہ

مجموعہ علمکار

مز آیک برنجی کوئی نشر اول نور

مؤسسی

احمد شعیب ، رضا توفیق ، محمد ہاریر

مقدمات

پورسہ معاملات . — حقوق اساسیہ بہ مسئل : رضا
توفیق . — روسیہ : احمد شعیب . — فردیون و نوساویون :
بدیع پوری . — حکومت و حریت خندہ سینٹرک فلسفہ سی :
رضا توفیق . — فرانسیہ اغلال کبری : احمد شعیب . —
سوسالیزم خندہ تشیمات : علی کامی . —

مدیر و صاحب امتیازی :

محمد ہاریر

نشمی : ۱۰ غروش

استانبول

امور اداره و تحریر : ملینہ مطہری

۱۳۲۶

فردیون و فوضاویون

مختلف مسالك اجتماعیه باشلیجه « فردیون » و « اشتراکیون » نامیه ایکی مکتبه ، ایکی بویوک صنفه تصنیف ایدیلورلر . تدقیقات اجتماعیه یی باشلیجه فرده حصر ایدن ، جمعیتک عنصر اصلینه مستند اولدینی اوصاف و حصائصدن واسع برمقیاسده استفاده ایتدیرمک ، بونک صورت مطلقه ده حریت افکار و حرکتی تأمین ایتک نقطه سندن اجرا ایدن اجتماعیون مسلك فردیونه سالکدر . بونلر ترقیات اجتماعیه نك ، افرادك قوای فاعله و فکریه سنك کندی نفع و خیر ذاتیسنه مصروف اولسی سایه سنده استحصال ایدیله بیله جکنه قانعدرلر . اشتراکیون - سوسیالیستلر - ایسه فردك استحصال ایتدیکی منافع و ثمرات ، واسع برمقیاسده ، یعنی هیئت عمومیه سیله نظر اولدینی حالده جمعیتک محصول تشکلاتی اولدېغندن بومره لر ی فردك کاملاً اقطاع ایتسی غیر جائز اولدینی ادعا سنده درلر . بونلره کوره فردك بوتون قوای فاعله و مؤثره سی باشلیجه جمعیتک منافعه خادم اوله جق یر یولده اولمیدر ؛ جمعیتک سعادت و سلامتی جمعیت حالنده یاشایان افرادینك مساوات تامه یه مظهریتلری ، هیچ بریسنك دیکرینه تفوق ایتمه سی ایله ممکندر .

اشتراکیونك افرادی مساوات تامه یه مظهر ایتک فکریه تأسیسات حاضره یی تخریبه مصروف اولان فکرلری نصل جمعیت حاضره ایچون برتهلکه تشکیل ایتش ایسه فردیوندن برقسیمی ده ، فرده حریت حقیقیه سی اعطا ایچون هدف اتخاذا ایتدکلری غایه خیالیله ده - تشکیلات حاضره اجتماعیه ده افرادك حریتی ینه جمعیتک سلامتی ایچون بر چوق قیود ایله تحدید ایدلدیکی جهتله - افراط وادیسنه کیده رك ، جمعیات حاضره یی زیر

وزبر ايدەجك كړيوه يه صاپمشلردر . بوسورتاه بوسوك قسمك تاسيس ايتدكلى مسلك ، « فوضاوى » (آنازشيم) ناميله براسم مخصوص

آمشدر . [۱]

بوسورتاه اجتماعيونك يوقاروده ذكر ايتديكمز ايكي بويوك صفنه منسوب بعض ذوات ، مختلف نقطه لردن حركت ايدن ايكي شخصك بعضاً بر نقطه ده بربريه ، تلاقيسي كې ، هرايكى ده جمعيات حاضره وتاسيسات مدنیه موجوده علمبنده مؤسس اولقى جهتيه تايه نقطه نظرندن متحد برر مکتب تشكيل ايتشاردر : اشتراكون وفوضاويون . بوايكي مکتبكنجى آيرى آيرى اولدينى ، برى فكر اشتراكيدن ، ديكرى فكر فرديدن خدای اصليدى آلدينى حالده مبادله افكار سايه سنده فكر اشتراكيدن ده حصه دار اولمش مسلك فوضاويلر كورلشدر . آنك ايچون اساساً مسلك فرديونه منسوب اولان « نيه جشين » ، « ستيرنه » ، « موريس بارهس » ك مسلكلرينه بر درجه يه قدر فوضاوى دخى اطلاق اولنه بيلديكي كې اساساً مسلك اشتراكونه منسوب اولان « پرودون » و « ماركس » ك مسلكلرينه فوضاوى اطلاق ايدلسه پك محق ، وياكلش بر تعبير اولماش اولور . مع مافيه بواچ كله نك ، فرديون ، اشتراكون ، فوضاويون معناسنى كوزلجه تدقيق ايتمك اقتضا ايدر .

« فرديون و اشتراكون » حقه ده بعض تدقيقاتى اولجه ايراد ايتمشيدك [۲] بومقاله ايله ده فرديون وفوضاويون مسلكلرى حقه ده تدقيقات اجرا ايدەجكز . بوتدقيقاته اساس اولان مقاله « پالانت » نام مؤلفك « مجموعه فلسفيه » ده مندرج بر مقاله سيدر .

* *

[۱] حريت شخصيه نك افراطنك ، ياكلش تلقيسنك فوضايه نصل يول آچدينى حريت مشدده . اخيره مزك ايلك كونلرنده پك واضح بر صورته تجلى ايتشدر : حريت ديمك ، هر كسه تعرض ، هر كسه تجاوز ديمك اولدينى ، آرتق ويركو يوق ، قانون يوق ، فكرى تعصم ايتديكى خاطر لرده در .

[۲] رسملى كتاب : نومرو : ۱۲

اول امرده هر هانکی برمسلك اجتماعى ايله عادى برمسلك فكرى ويا حسى آره سنده قطعى و واضح بر نقطه تفريق تعيين ايدلم . چونكه بونى تعيين واره ائتمكه فردى و فوضاوى بينده كى فرقلرى تعيين ايجون بر اساسه مالك اولمش اولورز . مسلك فوضاوى معنای لغویسی نه اولورسه اولسون حد ذاتده وقوعات اجتماعیه بی بر ضایه یه، بر هدفه سوق ایدن برمسلك اجتماعى ، بر فلسفه اقتصادیه ، سیاسیه و اجتماعیه در . روس فوضاوى شهیری « باقونیش » - كه معین بر شكل اجتماعینك یوقلغیه ایضاح ایدیله بیله جك اولان و هر نوع تأسیسات اجتماعیه بی رد وانكار ایدن - مسلك بیشكلى ايله یینه برمسلك اجتماعى تأسیس ایتك ایستر . حالبوكه مسلك فردیون فردك جمعیت قارشوسنده بر حالت روحیه سنی، بر تحس حیاتیسنى ، بر وضعیت دماغیه و حساسه سنى ارئه ایدر . ایشته مسلك فردیون تدقیقاتنى دائماً بو نقطه نظر دن هدف اتخاذا ایتلیدر .

مثلاً ساحه حقوقیه یه نظر اولنورسه صورت مطلقه ده « فردیت حقوقیه » فكرى یوقدر . مسلك فردیت، افراد بشریه نك وحدت تملكیه سنى و ببناء علیه حقوق جهندن مساوى اولدقلرینى بیان ایدر ایكن دقت اولونورسه بوراده معین برمسلك حقوقى و سیاسى واردر ، یوقسه صرف فردى، عادى بر مسئله فكریه غیر موجوددر . بوراده كى مسلك فردیت یا لكز لفظده ، نامدهدر . چونكه بوراده منحصرأ افراد بشر آره سنده موجود نقاط متشاركه موضوع بحثدر ؛ بو افراد آره سنده كى اختلاف طبیعت ، حقیقت ، جبرأ فردى و شخصی اولان شیلر موضوع بحثدن خارج براقیلور . بالعكس بو صوك عنصرى ، هر نوع تمایلات و احتراصات بشریه یى ، بر منبع شورش و ضرر اولمق اوزره تلقى ایدر . دیمك كه بوراده مسلك فردیون فردى نظر اعتباره آله حق یرده بشریتى ، جمعیتى نظر اعتباره آلیور ، او حالده بوكامسلك فردى دیمكدن زیاده مسلك اشتراكى و یاده اها عام اوله رق . مسلك بشرى اطلاق ایتك ده اولاددر .

شوالده مسلک فردی نه در؟ بوايضاحاته نظراً اساس اعتباریله مسلک فردی علمیدار اجتماع بر فکر معارضدر بو، فرد عندنده جمعیت حیاتی باشامقدن متولد، آز چوق صیقینتیلی بر تضیقندن عبارت حسدر؛ وعین زمانده کندیسنی احاطه واستیعاب ایدن معینت اجتماعیه [۱] قارشی عصیان و آندن شخصیتنی تخیلیص ایلک آرزوسیدر.

فرد ایله محیطی آردسند مجادله نك موجودیتی؛ انكار قبول ایتمین حقیقلردندر. ینه حکمت اجتماعیه نك حقایق بدیهیه سندندر که بر جمعیت بر کتله افراددن بشقه برشیدر بوافرادك تقریبی حادثه سی سبیل بر برینه مشابه وعمومی فرقه لرا کتساب قوته میل ایدرک کندیلرینه مشابه اولیان ودائرة عمومیتدن خارجده قالان فرق واقسامی محو و پریشان ایدرلر. افراد فائق و آنلر خارجنده اولق اوزره یکی بر شکل و ترتیب اجتماعی تشکل و تحکیم ایدر. بو ترتیب بر طاقم قاعده لر، عادت لر، انتظاملر، قانونلر، الحاصل فرد اوزرنده لاینقطع اجرای فعل و تأثیر ایدن بر تأسیس اجتماعی صورتنده تجسم ایدر. دیگر طرفدن هر فردده (واقعا شخصیت کوره مختلف درجه ده اوله رق) جمعیت حالنده کی حیات سویه سنه قارشی معارض بر طاقم حساسیت، ذکا، و اقتدار قوای متخالفه سی تظاهر ایتدیکندن عین زمانده انکشافه میال اولقله برابر ایجابات اجتماعیه قارشولرنده بر مانعه تشکیل ایتک اوزره بر طاقم استقلال، حظوظات و نفوذ انسیاقاتی تظاهر ایدر. جمعیت منافی نقطه نظرندن حرکت ایدن سوسیولوغلر ایله اخلاقیون بومبلاناتی بهوده یره «سرسری»، نتیجه سز، غیر حقیقی، مهلاک، اکتساب موجودیته حقلری یوق، کبی اوصاف ایله توصیف ایتشلردر جمعیت بونلری وحشیانه ویا مرأیانه بر صورتده تذلیل ایتمکه

[۱] معینت Déterminisme مسلک فلسفیی ختنده «حکمت اجتماعیه»

نام مقاله مفصله مزده ایضاحات کافی اعطا اولمشدی [علوم اقتصادیه و اجتماعیه مجموعه سی، نومروه] معینت قانونی موجبجه هر حادثه و لو حادثه اجتماعیه اولسون؛ مطلقاً بر سبیه بناء تحدت ایدر، اوسبب بالضروره او حادثه بی ایقاعه مقتضی و مؤثر در.

ینه پک بهوده یره اوغراشیور؛ کذلک ینه بوش عاصیه واستقلالکاره قارشی تخویف، تعدی، ازاله موجودیت اسباب و وسائلی تربید ایدیور؛ بوش یره، اخلاقیونک وضعکردهسی اولان قواعد اخلاقیه واسطهسیله فرده کندی ضعف ذاتینی و طاقتسزلکنی اقناعه صرف مقدرت ایدیور؛ «بن» حسی، - اجتماعی نقطه نظر دن اوقدر مضر و منخور اولان بنک حسی - بر طاقم روحلرده غیر قابل فنا اولهرق باشی قابلهجق، واوراده هر وقت، نامغلوب برصوتده، بر عصیان فردی ایقاعندن خالی قلمیه جقدر.

*
* *

حیات فردیه نک تکاملنده ایکی دوره تفریق اولونه یلور. برنجیسنده اوزرینه چونک معینیت اجتماعی بی تقدیر ایدر. فقط عین زمانده کندیلی ده بومعینیت میاننده بر قوت تشکیل ایتک حسی ایله متحسدر. بوقوت واقعا پک ضعیف ایسه ده فقط هر حائده، هر شیده رغماً، مجادله یه و غلبه یه مستعددر. هر تقدیره کوره قوتی جمعیه قارشی استعمال ایتدن منہزم اولقی ایسته مز، و کندی فعالیتنه، چویکلکنه ولدی اسلحه شبه و تر ددن وارسته اولمق لغنه اغترار ایدرک جمعیت ایله مجادله یه کیریشور. ، بویوک حریص جاهلرک، اکتساب نفوذ و اقتدار ایچون لایق قطع مجادله ایدنلرک تاریخ و قایمیدر. تاریخ ادبیاتک قید ایتدیکی نیجه ادیبلر، شاعرلر بومجادله یی ساحه ادبیه ده اجرا ایدرلر. بر قاردینال ده رج - فروند عصیاننده اهمیتلی بر رول اوینایان مشهور فرانسه سیاسی - برناپولیون، بر بیترامه ن فونستان شدت، عدم تردد، و موفقیت جهتلر یله متخالف درجه لرده اولهرق بومجادله یی وقوعات اجتماعی ساحه سنده ابراز ایدرلر.

استقلال و نفوذ ایچون فردیتک مجادله سنده استعمال ایتدیکی وسائیلک و صرف ایتدیکی مکنبک نه اولورسه اولسون، بو غیر مساوی مجادله ده فردک مظفر قالمسی نادر در. جمعیت پک قویدر؛ بزی صوک درجه متین فلاکت و سرنوشتی اغلریله او یو بر صورتله احاطه ایدرکه بوکا غلبه ایچون

پك چوق جهد و اقدام و اصرار ایامه مجبور اولورز. فردك جمعیت دیو آسا ایله بوججادلهسی چوق کره امیدسنزلك وجسارتسنزلك ایله مترافق ، هر وقت اعتراف مغلوبیته منجر اولور .

قوتلی افرادك جریان حیاتلرندن استنتاج ایتدکلی حس؛ احتراصاتلری ایله طالعلری آرهسنده غیر قابل ازاله برنسبتسنزلك موجودیتیدر . بونلر مختلف سرنوشتلر آرهسنده قالدقلری ایچون زبون و ناتوان چاپلارلر . « وینی » نام فرانسز شاعری « برشاعرك روز نامهسی » نام اثرنده دیرکه : « دنیاده ، حقیقت حالده ایکی جنس آدمدن بشقهسی یوقدر : « مالک » اولانلر ایله « قازانانلر »... کندم ، برنجی صنف میاننده دنیایه کلدیکم حالده ایکنجی صنف داخلنده یاشامغه مجبور اولدم . بتم اولمامق لازم کلن برطالع و بختی حس ایتك ، بنده هر وقت قلباً برعصیان قویار ایدی . « هانری هه نه » ك اثرلری دخی بومؤلم عدم مطابقتی ، مختلف تأثیرات اجتماعیه آرهسنده ، غایه خیاللر ایله افکار متضاده آرهسنده سوروکلنهن وهیچ بر یرده قرار قیلمق ایسته میهن شخصیت فائقه نك بو بحران و آلامنی مین منظره لری ارئه ایدرلر . ۱۸۴۸ سنه سنده یازمشدی که : « طالمك بوزمانده تعقیب و امید ایتدیکی شی ، قلبمه بوسبوتون یابانجی اولمشدر ؛ طالع قارشوسنده سرفرو ایدیورم ، چونکه آکا قارشی مقاومت ایدمه جك قادر ضعیف بولنیورم . »

آز چوق بر اثر فعالیت ، شدت عزمه مالک اولانلر بوا میدسنزلكی بو عجزی ، طالعك بوتحکم قیارانه سنی حس ایتمشدر ، نهایت ، و چوق وقت ، حال حیاتلرنده ، خائب و خاسر ، بر عتمان نومیدی یه القای نفسدن کری قالماملردر . وینی دفتر خاطراتنده دیمشدر که : « جناب حق ارضی هوا ایچنه القا ایتدیکی کبی ، انسانی ده طالعك سینه سنه آتمشدر . طالع بونی احاطه ایدر . و آنی دائماً خفی و قرا کلق قالان برضایه طوغری سوق ایلور . — عادی برطیعت سوروکلنیر ، فطرت عالیه اعجابی ایسه مجادله

ایدنلردر . بوتون مدت حیاتلرنده مجادله ایدنلر پک آزدر ؛ جریانه کندیلرینی قایدردقلری زمان بوشهورشناورلر غرق و نابید اولشلردر . —
 نیته کیم بونا پارت روسیه ده دوچار ضعف اولدی ، خسته ایدی ، مجادله ایده میور
 ایدی : طالع کنديسنی غریقیم نکبت ایلدی ؛ « قانون » اواخر عمرینه
 قدر کندينه حاکم اولدی . »

بو طبایع عالیه نك مجادلات مدهشه نك یانی باشنده پروبالی اوقدر
 کشاده اولیان عاجز سفینه لرده بحر حیاتده بوجالار . بونلر غیر ممنونلردر که
 متجاوز و متعددی فرض ایتدکلری بر جمعیت قارشی باشلی باشلرینه مقاومه
 غیر مقتدر اولدقلرینی بیلدکلرندن قوتلرینی — آنلرده کندیلرینی مغدور
 و متضرر عد ایدن — دیگر افراد قارشی توحید ایدرلر . بو غیر ممنوعلر
 بویوک جمعیت ایله متجادل اوفاق بر جمعیت تشکیل ایدرلر . بو ، بوتون
 انقلابچولرک تاریخ حیاتی و مناقب مجاهداتی احتوا ایدر . بونلر مبدألرنده
 کوچک ایکن توسعه ، و جمعیتی کندی شکلرینه کوره تحویله میالدرلر .
 بو نقطه نظر دن تدقیق ایدیلورسه فکر عصیان بر محلل اجتماعیدر ؛ فقط
 عین زمانده یکی بر جمعیتک بر تخم انتاشیدر . تاریخده بویوک بر رول
 اوینار ، واوراده فکر تبدل و ترقی بی اراءه ایدر .

لیکن ، بوراده ، قیود و تکلفات موجوده دن تخلص کریبان ایچون
 صرف ایدیلن مساعی موفقیتسزلکه منجر اولویور . محو و تخریب ایدیلن
 بر استبداده بشقه بریسی خلف اولور . اقلیت غالبه اکثریت متحکمه یه
 تحول ایدر . ایشته هر سیاستک محیط سقیمی بوراده در . بوندن تخلص
 کریبان ایدن ، بو اعتراضاته قایلین انقلاب فاعلیری ایچون نه سعادت !
 فقط تاریخ بویوک انقلابلری متعاقب قروموه لار ، مارالر ، روبسیه لر ،
 ناپونیولر ... کورمشدر . و ایشته آنک ایچوندر که فردک استحصا حریقی ،
 بحثده کی ترقی اکثریا کوز بویامقدن بشقه بر نتیجه یه منجر اولمامشدر .
 بوکی احوالده ، حقیقت حالده ، نفوذ و تحکیمک تبدیل موقع ایتمسندن

بشقه بر حادته یوقدر . انقلابی ایقاع ایدن اقلیتک تأثیر وتحریکیه هیئت
مجموعه نك افکار وحسیاتی بشقه اشیایه تعلق ایتش ، یکی برغایه خیالیه ده
تجسم ایشدر . لکن بوفکر لروبو حسلر ، عمومی وبرکتاه بشریه طرفدن
اشترک ایدلمش اولدجه درعقب آمرانه اونغه میل ایدرلر . معتقدات
ودساتیر شکلنده اوصورتله تبیل ایدرکه اسکی حکومت مینه نك تحکمی
کبی ، بونلره مخالفت وعدم مطاوعتی اصلا ترویج وقبول ایتز . تاریخده
منظور اولان بوحیط سقیمک شو نتیجه منطقیه سی فردیون ایچون
« وینی » نك « مواد سیاسیه ده لاقیدی » ترکیبی ایله ادا ایتدیکی فکری
تولید ایدر . بوشاعر دیشیدی که : « هانکی اویونچی طاقنك حکومت
تیا تروسته اثبات وجود ایتدیکی بزه پك آز تعلق ایدر . »

*
*
*

مسلك فردینك ایکنجی دوره سنه کلنجه : برنجی دوره جمعیه حاکم
اولق و آنی خیالنه کوره یچمک املیه تفاخر ایدن فردک جسورانه
واعتمادکارانه جدالندن عبارت ایدی . ایکنجی دورایسه صرف مساعینک
بیهوده اولدیغی تقدیر ایتدیکی دوردر . بو ، اجتماعی سرنوشتلر وتضیقلر
قارشوسنده ، غیر قابل ازاله برحس خصوصت ایله قاریشیق ، مجبوری
بر توکلدر فردیت بر ابدی مغلوبدر ، فقط هیچ بر وقت ضبط وقهر
ایدلمه مشدر .

حقیقت حالده فردینك ، فرد ایله جمعیت آره سنده درین وغیر قابل
ازاله بر مبانیت حسیدر . فردیون ، شخصیت صمیمیه لرله محیط اجتماعیلری
آره سنده کی غیر قابل اجتناب آهنگسز لکلری کنیدیلرینه خاص بر شدتله
حسن ایتک صورتنده یارادلمش اولانلردر . بونلر ، عین زمانده حیاتک ،
طبیعتک بو آهنگسز لکی تقدیر ایچون آنلره حقیقی وسیله وفرستلر بخش
ایتدیکی انسانلردر . بونلرده کرک توحش سائقه سیله ، کرک تجربه سیبیه
بو یله بر نوع فکر تحصیل ایتشدر که جمعیت فرد ایچون دائمی بر مولد

مظالم، برمولد ذلت، برمولد سفالت، آلام بشریه ایله وجوده کش بر نوع تأسیسدر. کندی تجارب واقعهری وحسیات حیاتیهلری نامنه اوله رق فردیون، فرد ابله جمعیت آردسند آهنگ مطلوبی حاصل ایده جگ اولان جمعیات مستقبله یی بوسوتون خیالی بررؤیا مرتبه سنه اصعاد ادعاسنده بولنورلر. مدیتک تکملی فالنی تنقیص ایتک شویله طورسون، فردک حیاتی کیتدکجه تحکم ایدن بر جمعیت بیکلرجه دولابری آردسنددها مشوش، دها سبی آلود، ودها اضطراب آور ایتدیکندن بونک شدتی تزید بیه ایدرفکرنده درلر: فنون بیه، فرده جمعیت طرفندن وجوده کتورولن شرائط حیاتیه پی حس و تقدیر ایتدیرمکه آفاق فکریه ومعنویه یی انعام ایتدیکدن بشقه بر نتیجه یی انتاج ایتز.

کورایورکه مسک تفرد اساساً بریدی بی اجتماعیدر. اک معتدل شکلی تحتد، جمعیت حالده حیاتی، فردتی تماماً احیا ایدن برمضرشی اولسه بیه هیچ اولمازه فرد ایچون ظالم ودائرۀ فعالیتی تحدید ایدیچی، ضروری بر بلا، براهون شر اولقی اوزره عد و اعتبار ایدر.

بویولده دوشونه ن فردیون، مکدر و محزون بر اوافق کتله تشکیل ایدرلرکه بونلرک اطوار عاصیانه، متوکلانه ویانومیدانه لری نیکیکن سوسیولوغارک استقبال ایچون وعد ایتدکری نمایش مظفریت ایله بر تضاد تشکیل ایدرلر. وینی دیر ایدی که: «ترتیب اجتماعی هر وقت فنادر. وقت یالکز قابل تحمل بر حالده اوله بیاور. فادن قابل تحمل بر حاله انتقال ایچون بر دامله قان فداسی دکمز.» بوفکر، نومیدینک ضایه سنی کوسترر: تسلیمیت کامله ایله جریان حیاته قاپلق! «شوپنهور» حیات اجتماعی بی بشرک اضطراباتنک وقبایخنک انکشاف علویسی نظریله تاتی ایدر. «ستیرنهر»، افکار اجتماعی احتیالاتنه وهر جمعیت مؤسسه نک فردی تهدید ایدن تبایر فکری و اخلاقینه قارشی دائمی صورته تحفظ لزومی تحطیر ایدن بر فلسفه تنقیب ایدر. «آمهل» جمعیتی طبیعت فکریه سنک

سربستیدنی تحدید ایدر بر تضییق اولمق اوزره تلتی ایدر. « شالامل لاقور » جمعیت و ترقی حقنده بدین نظریه لایراد ایدر. « تارد » بیه مردمکریزلك ایه منقوش مسلك فردیسی ایه دیرکه : « احتمالدرکه تقلید جزر ومدی نهایت مناسب بر ساحله تأثیرخی کوسترسون ، و احتمالدرکه قابلیت اجتماعیه انبساط فوق العاده سی تأثیریه تناقص ایدر ؛ و یا مختل اولور ، و یا خود معتدل بر مبادله تجاریه ایه ، انجق کفاف ، نفسه منحصر فقط هر بریزده شخصیت باطنیه مزك اوصاف میزدنی تقویه مساعد اولان بر نوع فعالیت صناعیه ایه پک زیاده قابل تألیف اولان عمومی بر مردمکریزلكه تحول ایده جکدر. » حتی صنعتکارلق حسیله نومیدانه بدینلکدن و آجی فریاد عصیان

اظهارندن متحاشی اولان « موریس باروس » نزدنده بیه فردیت ، « شخصی بنی عمومی بن ایه تألیفی غیر ممکن » بر حسد بر مؤلفنده شخصی بنی تقریق ایتک ، الك حقیقی الك خصوصی تقرعاتی ایه و بوتون اعمالی موجودیتندن تحری ایدرک کمال وضوح ایه میدانه چقارمق ، حتی بونی تمیه و تغدیه ایتک حسی واردر. « حر بر آدم » اثرنده دیرکه : « فردیون ، آکلایه مدقاری کندی حقیقی « بن » لرینه اغترار انسانلر کتله سیله مشترک و عام اولان شیلرینی جریحه دار ، تلویث وانکار ایدرلر عرقز انسانلرینک حیثی ، منحصرأ هر کسک ظانمیدنی و کورمه مدیکی ومع مافیه کندمرده تمیه به مجبور اولدیغز بر ظالم حرکات مرتعشه به مربوطدر. » فردیونک کانه سنک نظرنده فردیت ، داخلنده یا شامغه مجبور اولدیغمز جمعیت متشکله به ، و بوجعیت متشکله نیک یکنسق قاعده لرینه ، اجازات مستبدانه قارشی محاصمه وعدم اعتماددن بیقیدی و حقارت طوغری سوق ایدن بروضعیت حساسه در. بو، جمعیتدن قاجق ، و کندی کندینه کوشه ازوایه چکلمک حسیدر. برده هر شیدن زیاده ، تأثیرات اجتماعیه نیک نفوذندن و تضییقاتندن آزاده قلمش اولان « بن » حس عمیقی ابقا و محافظه در. موسیو تاردک دیدیکی کی « اشخاصک عمیق و یازوالپذیر

غیر ابتلایی ، یا لکڑ بر کرہ بنہ مخصوص و برمدتہ مقصور اولان طرز حرکتلری ، طرز تفکرلری و طرز تحسسلری « در .

* *

بووضعیت و حرکتک فوضا و یونکیلدن نہ قدر فرقلی اولدیغنی
ارائہ یہ لزوم وارمیدر ؟

شبهہ سزددر کہ بر نقطہ نظرہ کورہ ، مسلک فوضاوی مسلک فردیدن باحثدر .
حتی ینہ جیش دیمشدر کہ : « مسلک فوضاوی ، مسلک فردینک برواسطہ
تحریکندن بشقہ برشی دکلدر . » وفی الحقیقہ فوضا ، ترتیب حاضر ایجابجہ
کندیسنی متجاوز علیہ و یا حق سلب ایدلمش عد ایدن براقلیتک جمعیت
عالمیندہ کی عصیانیدر . فقط فوضا ، فردینک یا لکڑ ایلک دوردهسنی احتوا
ایدر : اعتماد و امید ، موفقیتہ طوغری جسورانه واملپیرانه اجرای فعالیت
دوریدر . فردیت ایکنجی دوردهسندہ ، ایضاح ایتدی کمز کی ، بر بد بینی
اجتماعی یہ تحول ایدر .

بورادہ اعتماددن ، امیدسزلکہ ، نیکیینلکدن بد بینلکہ انتقال مسئلہ سی
بر مبحث روحی تشکیل ایدر . او یلہ نازک روحلر واردر کہ حقایق اجتماعیه یہ
تماسلہ پک چابوق متأثر و بناء علیہ خیالاتلرینک انطفاسنی سرعتلہ کورمکہ
مستعددر : وینیی ، هن کی . بونلری مبحث الروححنہ « حساس » تسمیہ
اولنان صنوفہ منسوب عد ایدہ بیلورز . بورو حلا یچون معنیت اجتماعیه
فرد ایچون اک ضیق آور عد اولنان ثقلیتلہ صوک درجہ کلال آور
و تحملمفسادر . فقط دیکر بعض روحلردہ واردر کہ مغلوبیت و مہزومیت
مکررہ یہ مقاومت ، اک سرت دروس تجربیہ یی بیلہ رد و اعتمادلرندہ غیر
قابل تزلزل بر مکانتلہ ثبات ایدرلر . بورو حلا صنف فعالہ منسوبدرلر .
باقونین ، قروفوتکین ، ره قلوبس کی فوضاویلر ایشته بوسیالردندر .
احتمالدر کہ هدف آماللرینہ قارشی اولان اختلال ناپذیر اعتمادلری حدت
فکریہ و حساسلرینک ضعفندن ایلر و کلیور . بونلردہ شبهہ وجسارتسزلک

فکرلری ، بینلرنده اعمال و تصور ایتدکلی غایه حایله مجردی تخریب و فردیتک منزل نهائی و منطقیسی اولان بدینلکه ایصال ایده بیله جک درجهده قوتلی دکلدر .

نه اولورسه اولسون ، فلسفه فوضاویه نك نیکیسلکی شبهه سزدر . بو نیکینك ، بو مسلك مروجلرینك غداى فکرینسی تشکیل ایدن قان قمرزینسی رنگلی قابلی جلدلرده دور و دراز تفصیل ایدیلور . نیکین روسونك خیالی بوتون بو جلدلرده ترسم ایدر [۱] فوضاویلر اعتقاد ایدیورکه اجتماعی آهنگسترلکلر ، حال حاضرک فرد ایله جمعیت آره سنده اراره ایتدیکی اثرمبانیت اساسلی دکل ، بلکه عارضی و موقدر . بونلر برکون حل اولنه جق ، و بردور منتظم و آهنگداره تحول ایده جکلدر .

مسلك فوضاوی بربرینسی تتیم و اکمال ایدر کی کورلدیکی حالده حقیقته مخالف ایکی قاعدهیه ایتلاید برنجیسی صرف فردی ویاسر بی تی اولوب « کیلوم هومبولد » طرفندن درمیان اولندینی حالده « ستوارت میل » طرفندن اخذ و « سربستی حقنده تدقیقات » نام کتابنه سزلو حه اوله رق وضع ایدلمشدر : « قاعده اصلیه وعظیمه بوتون فردی فروقاتیه برابر تکمل بشرینك اهمیت اصلیه و قطعیه سنی تقدیردر » دیگرى ده قاعده انسانیتکارانه و یا دیگر پرستانه درکه ساحه اقتصادیه ده « اشتراك فوضاوی » نامی اخذ ایدر . فردیت و انسانیت اساسلرینك بربرلرینه مغایر اولدقلری منطقا ده ، وقوعاته ده ثابت و محققدر .

یامسلك فردیونك اساسی هیچ برمعنای افاده ایتمز ، یا خود افرادی بربرندن تقریق ، تخالف ، تباین ایتدیرن اوصاف جهتندن ، افراد نزدند موجودیتی تصور اولنه بیلن اختلاف و مساواتسزلق جهتندن مطالباتده و مطالعاتده بولنور . مسلك انسانی ایسه بالعکس جنس بشرک تشابهی

[۱] روسو ، جمعیت حاضرده بکنمه مک نقطه سندن بر بدین ایدیسه مستقبلده بوکا قات قات فائق ، هرجهتله مسعود و منور بر جمعیت اساسی تصور ایتکله نیکین اولیور .

هدف مقصد قیلاز . بونك ضایہ خیالیہ سی ، « ژید » ك دیدیكی كبی شو
 هر وقت تكرار اولان كلمہ یی : « همجنسار من » كلمہ سنك معنای لغوی سنك
 تضمن ایتدیكی مشابہتی حقیقته ایصال ایتكدرد . ساحه حقایقه انتقال
 ایدرسه ك حال حاضرده ایكی مسلكك مبانیتی فوضاویونك اك ایلری كلن
 نظریاتسناسلری میاننده تجلی ایتدیكی و بو مبانیت منطقیه و ضروریه نك
 اك نهایت مسلك فوضاویونك برمسلك سیاسی و اجتماعی حالتدن چیقهرق
 تفصیحی ایجاب ایتدیره جكنی مشاهدہ ایدیورز .

هرنه اولورسه اولسون ، و مسلك فردی اساسی ایله مسلك انسانی
 اساسی یكدیكریله تألیفه جالیشانلرك اوغرا دقلری مشكلات نه درجه اولورسه
 اولسون ، بو بربرینه معارض و رقیب مسلك بر نقطه ده اتحاد ایدرلركه
 اوده هر ایكی سنك ده پك آچیق بر صورتده نیكین اولدقلری نقطه در .
 هومبولدك نظریه سی اوجهتدن نیكیندر كه طبیعت بشریه نك اساساً یولكنی ،
 و سربستی انكشاف و تظاہرینك مشروعیتی قبول و ترویج ایدر . مسلك
 انسانیتپروری دخی بوندن آشغی نیكین دكلدر . فی الحقیقه ، بو مسلك
 عمومیتی ، جنسیتی و بناء علیه بالنتیجه جمعیت بشریه سی اعتباریله انسانی
 اقصای تكمله دها طوغریسی انسانلقدن خارج بر مرتبه ملكیته اصعاد
 ایتكدن بشقه برشی دكلدر . مسلك فوضاوی ایسه ، اولجه كوردیكمز
 كبی فرده تعلق ایدن جهتدن نیكین اولدیقی كبی جمعیه متعلق خصوصده
 نیكیندر . بومسلك حریت شخصیه ، كندی كندینه ترك ایدلدیكی زمان
 سربست بر جمعیت فوضاویه ضایہ خیالیه سی ساحه حقیقه ایصال ایتك
 صورتیله جمعیتی فردایله امتزاج و ائتلاف ایتدیرمكی تعقیب و تحری ایدر .
 برده خرسیتانلق نقطه نظرندن مسلك فردی واردركه بونك ایله
 فوضاوی نقطه نظرندن فردیتك بیننده كی فرقلری تدقیق الزمدر .

مسلك فردیون ، حیات ماضیه و حسیات آنیهی محتوی بر فلسفه
 عقلیه اولمق اوزره آتیده كی ایكی مفهوم حكمییه معارضدر : بری فلسفه

خرستیانیه که استدلالی اوله‌رق طبیعت بشریه‌ده فسادی اصل اوله‌رق قبول ایدر ؛ دیکری روصونک و یا عقلی فلسفه‌درکی کنذک استدلالی اوله‌رق طبیعت‌مزده خیری اصلی و اساسی اولقی اوزره تلقی ایدر . — مسلك بو خصوصده احوال و وقوعاته تابع اولور . وقوعات ازانه ایدیورکه افراد بشریه‌ده بربرلریله حال مجادله‌ده بولنان بر حزمه انسیاقات ، جمعیت بشریه‌ده ایسه کنذک بالضروره یکدیگریله حال جدالده بولنان بر کتله افراد واردر . بو شرائط حیاتیه سببیه بشر ، قانون مجادله‌یه تابعدر :

بالذات کندی انسیاقات آرمسنده داخل مجادله ایتدیگی کچی همجنس‌لری ایله‌ده خارجاً مجادله‌یه محکومدر . اگر موجودیت بشریه‌ده‌کی خودپرستک و جدالک اوصاف و طبایع دائمه و عمومیه‌سنی طایبق بدین اولقی ایسه احوالده فردیونه بدین دیمک ایجاب ایدر . لکن شوراسنی‌ده اونو تماملیدرکه فردیونک بدینلکی بر بدینی فعلی ، بر نوع بدینی تجربی ، بر بدینی استتاجیدر ، و بدینی خرستیانیدن — که استدلالی اوله‌رق و صرف عقیده نامنه طبیعت بشریه‌یی محکوم فساد قیلار — بوسبوتون فرقلیدر .

دیکر طرفدن فردیون پک آچیق بر صورتده فوضاویوندن افتراق ایدرلر . فردیون فوضاویون ایله برابر هومبولدک قاعده‌سنی طبیعت‌مزنک تمامی انکشافی حالنده‌کی میلانات عادیه و ضروریه‌سی اولقی اوزره قبول ایدرلر سه‌ده عین زمانده بومیلانک ، طبیعت‌مزنک داخلی و خارجی انتظام‌سزلقلری و امتزاج‌سزلقلری حسبیه هیچ بر وقت تحقق ایتهمکه محکوم اولدینتی‌ده تقدیر ایدرلر . موسیو میچنقوف نیکیین اولقله بر بر حیات اخلاقیه و اجتماعیه‌ده طبیعت بشریه‌نک تماماً امتزاج‌سزلقنه قائلدر . مع مافیه ترقیات فیه سایه‌سنده بو انتظام‌سزلقنک امتزاج‌سزلقنک زوالی بکلر . الحاصل فردیون فردک و جمعیتک بر بریله متمزجاً ویک آهنگ اوله‌رق تکملنی غیرقابل حصول و تحقق بر خولیا عد ایدرلر . — فرده تعلق ایدن خصوصاتده بدین

اولان فرديون، جمعيتہ متعلق خصوصياتدها آز بد بين دکادرلر :
 انسان، انسياقاتنک جدال داخليسي سبيله، طبيعه امتزاجسر بر
 مخلوقدر. فقط بو امتزاجسرلق، انسياقاتمزي تضيق ايتمکه برابر
 آنلرک جدالي تشديدایدن حال اجتماعي سبيله، ترايدایدن. في الحقيقه
 آرزوي حيات فرديلرک تقاربندن بر آرزوي حيات کتلوي تشکل ايدرکه
 بو، تشکلي متعاقب، آرزوي حيات فردی ايچون درعقب متجاوز
 وظالم بررنک اکتساب ايدر، وبوتون قوتيله افرادک آرزولرينک،
 سربستيلرينک انکشافه مانع اولور. ايسته بو صورته حال اجتماعي
 طبيعتمزدهکي امتزاجسرقلري مرتبه نهييه ايصال، وبونلري تشديد
 ايتمکه ماهيتلريني برقات دهها اظهار ايلر. ايسته جمعيت، بوتون
 احتراصاتنک، منازعاتنک، سفالتلرينک حد اعظميسي ايله آرزوي حيات
 بشري يي تمثيل ايدر.

*
* *

فوضاويون ايله فرديونک ومسلکلرينک بو تضادندن بشقه نوع
 مبانيتلرده ظهور ايدر.

فوضاويون ترقيه اعتقاد ايدرلر. فرديون مسلكي ايسه اويله بر
 وضعت تفکريه درکه غير تاريخي تسميه اولنه بيلور، ترقيني، طالع وقسمتي
 رد وانکار ايدر. آرزوي حيات بشري يي دائمي بر حال حاضر ايچنده
 مشاهده ايلر. مثلاً ستيره، شو پنهاور کي، بر فکر غير تاريخيدر.
 بوده، ياريندن يکي وبويوک برشي بکله مک بروهم اولديغنه معتقددر. هر
 شکل اجتماعي، تکش وتبلر ايتمسيه، فردی احما ايدر. ستيره کوره
 نه خيالي بر يارين، نه ده عمر مزك نهايتنده بر جنت يوقدر، يالکز بر
 خود پرست «بوکون» واردر.

ستيره نه رک جمعيت قارشوسنده کي وضعتي شو ينهاورک طبيعت حياتيه
 قارشوسنده کي وضعيته بکزر. شو پنهاوره کوره معدوميت حيات، يالکز

مغویدر (شو پنهاور حیاتک معدومیت مادیسی دیمک اولان اتحارک علیهنده در.) ستیرنه رک جمعیت علیهنده کی عصیانیه ده صرف مغوی ، صرف داخلی ، صرف آمال صمیمیه دن متولد بر عصیاندر . باقونین مسلکهنده اولدینی کی ازاله هر موجوده دعوت دکلدر . بو عصیان جمعیه قارشو مخاصمانه و فقط غیر متعديانه بر عدم اعتماد اثری ارائه سی ، بر لاقیدی و محقرانه بر توکل اظهاریدر . بوراده فرد ایچون جمعیه قارشو مجادله ایتک موضوع بحث دکلدر ؛ چونکه جمعیت دایما ده قوتلی اوله جقدر . بناءً علیه آکا اطاعت ایتلیدر ؛ بر اطاعت کلیه ایله آکا منقاد اولمایدر . فقط ستیرنه ر جمعیه مطاوعت ایتکله برابر مقام تسلیته ده بوکا قارشو عظیم بر لاقیدی فکری محافظه ایدر . بو ، طبقی « وینی » نک شخصیتنه تجسم ایدن فردیت نومیدانه نک ، طبیعت و جمعیت قارشوسنده کی وضعیته بکزر . « تقلصات غضوبانه دن و سایه عطف قباحندن آزاده اولمق اوزره ساکنانه بر نومیدی عین حکمتدر » بونک سوزیدر ، کذلک « سکوت ، حیاتک اک اعلا تنقیدیدر » جمله سی بونک درجه نومیدینسی ارائه ایدر .

مسالک فوضاوی ایسه عقورانه و مجنونانه فکری احتوا ایدر . فردیون مسالکی انسانی محکوم قهری قیلان مرحتسز حقایقه استناد ایدر . ظایه سی بر آلمان مؤلفنک دیدیکی کی حیاتی و جمعیتی فکر سز - لشدیر مکه منجر اولور « ستیرنه ر » ، « بر ظایه خیال بردامه طاشندن یشقه بر شی دکلدر » دیمشدر . بو نقطه نظر دن « ستیرنه ر » فردیونک اک حقیقی تمثالیدر . بونک بیانات بارده سی ینه جشک حرارتلی و پارلاق بیاناتدن بوسبوتون فرقی بر صورتده روحه تاثیر ایدر . نیه جش شدتلی فکر یوندندر ، بشریت عالییه یی ظایه خیال عد ایدر .

صوک درجه ده و احتیاط سز جه سنه بدین اولان فردیون صورت مطلقه ده علیهدار اجتماعدر . فوضاویون ایسه بونلردن فرقی و جمعیت علیهدار لقلری صرف جمعیات حاضریه مقصوددر .

فوضاویون ، فرد ایله حکومت آره سنده بر مبانیت اساسنی قبول ایدرلر ،
 و بو اساسلرینی حکومت اساسنی لغو و احیا نقطه سنه قدر ایصال ایدرلر ؛
 فقط فرد ایله جمعیت آره سنده غیر قابل تألیف ، بر مبانیت کورمز لر .
 فوضاویون حکومتی تابعین ایدرلر سه ده جمعیتی عادتا تعزیر و تقبیلر ایدرلر .
 چونکه بونلرک نظر نده (سبسر) ک دیدیکی کبی جمعیت بنفسه تشکل
 و تنی ایتشد . حالوکه حکومت بر تأسیس صناعی و تحکیمدر . فردیون
 نظر نده جمعیت ده ، حکومت قدر ، بلکه آندن زیاده متحکمدر . فی الحقیقه
 جمعیت هر نوع روابط اجتماعیه نک هیئت مجموعه سندن بشقه برشی دکلدر .
 (افکار ، اخلاق ، عادات ، مناسبات ، وصایت و نظارت متقابل ،
 بشقه لرینک احوال و اطوارینی آزچوق خنی بر ترصد ، تحسین و یا قبیح
 اخلاق و سائر کبی ..) بو نقطه نظر دن تلقی ایدیلنجه جمعیت ، حیات
 فردیه نک تفرعاتنه حکومت دن دها زیاده نفوذ و حلول ایدن جبار و مختصر ،
 غیر قابل اجتناب ، متمادی ، مرتسمز بویوک ، کوچوک تحکملردن وجوده
 کلش بر نسج تشکیل ایدر . فضله اولارق تحکیم اداری ایله تحکیم اخلاقی
 عین بر جذردن تشعب ایدرلر : هر ایکسی ده حکم و نفوذینی تأسیس و یا
 ادامه ایتک ایستیهن بر قبیله و یا بر صنفک منافع کتلویه سیندن عبارتدر .
 افکار و اخلاق قسماً محو اولوق طریقی طوتمش اسکی قبیله انتظاملرندن ،
 قسماً ده کندیسیله برابر حال تشکلده بولنان یکی صنوفی میدان کتورن
 روابط اجتماعیه تخمیلرندن عبارتدر . ایسته بونک ایچوندر که حکومت
 تضییقی ایله فکر و اخلاق تضییقلری آره سنده بر درجه فرقتدن بشقه
 بر شی یوقدر . بونلر اساساً عین غایه یه متوجهدر : کتله یه نافع اوله جق
 بر تطابق معنوی یی ادامه و عین مقصده مبنی افکار مستقلا و مرتبجه
 اصحابی ازاله ایلک . یالکز برفرق واردر که افکار و اخلاق دیکر لرندن
 زیاده مرآتیدر .

پرودون حکومت جمعیتک آینه سیندن بشقه برشی دکلدر دیمشدر .

بونک مستبد اولمی جمعیتک مستبد اولمسننددر . « تولستوی » کورمه حکومت بشقه لرینی استخدام ایله آنلردن انتقاع ایدن وبالخاصه کوتولری و دسلسلری التزام و استخدام ایله بن بر انسان کتله سنک تجمعیذر . اگر حکومتک ایشی بو ایسه جمعیتک ایشی ده او دیمکدر . بناء علیه حکومت و جمعیت کلمه لری آرسنده مطابقت تامه واردر . هر بری دیگرینه مساویدر . فکر تکتب و یافکر اجتماع فرد ایچون حکومت فکرندن آزمتحکم و متجاوز دکلدر . غریبدرکه « ستیرنر » بیله حکومت ایله جمعیت مناسباتی نقطه سندن سپنسر ایله باقونینک فکرینی قبول ایتیش کبی کوریلور . فردک افعال و حرکاتنه حکومتک مداخله سی علیه پروتستو ایدرسده جمعیتک مداخله سنه قارشى اعتراض ایتمز . « یگانه » نام اثرنده دیرکه : « فرد قارشوسنده حکومت برا کلیل قدسیت ایله تئوج ایدر ؛ متلا دوئللو اوزرینه بر قانون یاپار . بر مسئله یی نسویه ایتک ایچون حیاتلرینی تهلکه یه اتما ایتکی مقاوله ایدن ایکی آدم ، حکومت ایسته مدیکی ایچون ، بومقاوله لرینی اجرا ایدمزلر : چونکه تعقیبات عدلیه یه و جزای قانونی یه معروض قالورلر . سربستی اراده نرده . قالور ؟ حالبوکه آمریقای شمالیده اولدینی کبی ، بعض قبائلده جمعیت دوئللو ایدنلری افعال واقعه لرندن طولانی فنا تیجه لره گرفتار ایدر ، ومثلامقدما حائر اولدقلری اعتباری استرداد ایلر . اعتبارینی رد ایتک و بخش ایتمه ک هر کسه آری آری طائد برایشدر . واکر هر هانکی بر سبدن طولانی جمعیه اعتباری استرداد خوشنه کلیورسه محکوم ایتدیکی آدم حریتنه وقوعبولان بوتجاوزدن طولانی شکایت ایدمز ، چونکه جمعیت کندی حریتی استعمالدن بشقه برشی یامامشدر . و بوجمیت بویولدم حرکت ایتکه فردی خط حرکتک ایجاب ایتدیکی نتایج وخیمه ویاغیر مرضیه یه معروض براقفده تماماً سربست براقفده برابرحریت اراده سنی تماماً وکاملأ کندیسنه اعطا ایدیور . حکومت ایسه عکسنی یاپیور : فردک

آرزو و اراده‌نی هر نوع مشروعتیدن تجرید ایدیور، و کندی اراده‌سندن، حکومتک قانونندن بشقه مشروع برشی طانیور. »

— غریب برطرزحاکمه: قانون‌بنی مؤاخذہ ایتیور، فقط اگر جمعیت بنندن اعتمادنی سلب ایدر، بخله مناسبتی قطع ایلرایسه بن آرتق سربستی اولمش اولورم؟ بوکی مطالعات هر درلو تعصب اخلاقی افکار فاسده‌سی علیهنده فردہ قازشی تعرضلری مشروع قیلار. ایشته آنغلو — ساقسونلرده حریت شخصیہ عنعناتی بوکی مطالعات اوزرینه مؤسسدرد. ستیزه بیلہ افکار و مطالعاتنک فسالغی تقدیر ایتمکه برابر دها ایلرویه واره‌رق جمعیت ایله اجتماعات و اشتراکات آره‌سندہ کی فرقلری تعیین ایدن نظریه مشهوره‌سی سرد ایلور: جمعیتده فرد برواسطه اوله‌رق آلمشدر؛ اشتراکده ایسه فرد کندیسنی برغایه اوله‌رق تلقی و اشتراکی اقتدار و یا حظوظات شخصیہ‌سک برواسطه‌سی اولق اوزره استعمال ایدر. «یکانه» اثرنده دیرکه: «اشتراکده هر درلو اقتدارکی، بوتون ثروتکی استعمال و اهمیتکی تقدیر ایتدیریورسک. جمعیتده ایسه سندن و فعالیتکدن استفاده ایدیور برنجیسندہ خود پرستانه و سرآزادانه یا شارسک، ایکنجیستندہ ایسه هر شیئیکی جمعیتہ مدیونسک، سن آکا متدارسک، و برطاقم وظائف اجتماعیه آلتندہ ازملمشک؛ اشتراکده هیچ برشیئه بورجلی دکلسک؛ اوسکا خدمت ایدر، و آندن استفاده استحصال ایدہ مدیکک کی بلامشکلات اورادن آیریلہ بیلورسک...» «اگر جمعیت سندن فضلہ برشی ایسه اوئی کندیکه تقدیم ایدر، و کندیکی آنک خدمتکاری عدا ایدرسک؛ اشتراک سنک آلتک، سنک سلاحکدر، سنک قوای طبیعیه کی تشدید و تزئید ایدر. اشتراک انحق سنک ایچون سنک واسطه کله موجود اوله بیلور، جمعیت ایسه بالعکس سنی برمالی کی عدا ایدر و سنسز یا شایه بیلور. الحاصل جمعیت مقدسدر، اشتراک سنک ملکه‌کدر. جمعیت سنی استعمال ایدر. اشتراکی سن اداره ایدرسک...

بو تفریق پک بیهوده در . چونکه حقیقی جمعیت ایله اشتراک آره سنده کی حدودی تفریق غیر قابلدر . حتی ستیز بر بیه اشتراکاتک نهایت جمعیت حائده تبلر و تکائف ایتدیکنی اعتراف ایدر .

هانکی معناده تلقی ایدیلورسه ایدلسون فوضاویون ایکی مابین تعبیر ، جمعیت و حریت شخصیه ، آره سنده بر صورت ائتلاف عقدینی غیر ممکن عد ایدر لر . بونلرک تصور ایتدکلری حر جمعیت ، معنوا الفاظنده بیهله متبایندر . طبق اودوندن دمیر ، اوجسزدکنک کبی . نیه جیش فوضاویوندن بحث ایدرکن دیرکه : « بوتون دیوارلرده ، و بوتون لوحه لرده بونلرک استقبالده تخیل ایتکلری کله بی اوقومقی نمکندر : سربست بر جمعیت . — سربست جمعیت ! پک اعلا ، لکن بیلور میسکیز بونه دن یاییلور ؟ — « دمیردن تحتیه ایله ... » فردیون ، فوضاویوندن زیاده معنیدار و آچیق سوزلیدر لر . حکومت ، جمعیت و اشتراکی عین سویه ده اقامه ایدر ؛ و بونلرک هپسینی رد ایدر . وینی « بوتون اشتراکاتک بر مناسرتکی تقایصی واردر » دیمشدر . یعنی اشتراکاته داخل اولغله فردیت حریتی تحدید ایتش اولیور .

علیه دار اجتماع اولمقله فردیونک مسلککرینک بالطبع مغایر اخلاق عد ایدمللری ده صورت مطلقه ده طوغری دکلدرد . مثلاً « وینی » نزدنده فردیون مسلکک بدینلکی شدتلی ، صاف و علوی بر متانتله امتزاج ایتمشدر . مع مافیه بونده ده مغایر اخلاق بر عنصر موجوددر : جمعیتی هدف خیالدن اسقاط ایتک ، جمعیت و حرکات اخلاقیه مفهومیلری بر برلرینه معارض عد ، و جمعیتی قورقاقلغک ، فکر سزلکک و مرایشلکک مولد منحوسی کبی تلقی ایلک . ستیز و استاندال اثرلرنده ایسه فردیونک ، اخلاق سزلق قوقوسی بوتون بوتونه تظاهر ایدر . فوضاویون مسلکی اولدجه قایا بر اخلاقه مشوعدر . مع مافیه فوضاویونک مسلک اخلاقیسی ده غیر مجبوری و واسطه تأییدیه دن محروم اولدینی ایچونینه بر اساس اخلاقی بی محتوی دکلدرد . فوضاویون آهنگ اجتماعی به الزم اولان فضائل لازمه

کندی کنديک لکرندن نما بولور فکرنده درلر . جبر واکرا هک خصمی
اولان فوضاویون تابلرله بیله عمومی مغازه لردن آرزولرینی تدارک قولایانخی
بخش ایتشلردر . فقط فوضاوی بوکامعتقددر که تشکیلات فوضاویه مستقبلا ده
تابلر پک نادر اوله جق ، یا خود هیچ بولنیه جقلردر .

*
*
*

نیکیین و فکر انسانیت پروری و بر مسلك اخلاق ايله مشبوع اولان
مسلك فوضاوی بر تعقید و اجتهاد اجتماعیدر . فردیون مسلكی ایسه تعقیده
منافی و اجتهاده پک آز مائلدر . بر فردک ، حیات و جمعیت حقنده کی انکار
شخصیه سنی بشقه سنه تعمیه مایل دکدر . طبایعک اختلافه و بر قاعده
اصلیه و یکانه نك فائده سز لکنه مطمئن اولدینی ایچون بر مؤلفک سوبلدیکی
شو سوزلری هدف مسلك اتخاذ ایدر : « هیچ بروقت بر کیمسه نك بزم
طرز حیاتی قبول ایتسنی آرزو ایتهم : چونکه بونی بشقه سی اوکره نتیجه
قدر بزم بر بشقه طرز حیات کشف ایده جکمدن صرف نظر دنیاده
ممکن اولدینی قدر بر برندن فرقلی اشخاص بولنسنی آرزو ایدرم ؛ فقط
ینه آرزو ایدرم که هر کس کندینه مخصوص بریول طوآسون ، یوقسه
پدرینک و والده سنک ، قوموشونک یولنی دکل . » فردیون ، مسلك فردیته
مخاصم طبایعک موجودیتنی بیلور . و بونلری اقناعک فائده سز لکنه ده
حکم ایدر . وحدت و استقلاله مشتاق ، بر مستغرق تفکر ، صرف حیات
داخیه مجلوبی اولان بر آدم نردنده حیات اجتماعیه ايله بونک تهیجاتی
معنا سز ، و حسیات صمیمه دن تجرید ایدر برشی نظریه تلقی ایدیلور .
و بالعکس طبعه حیات و حرکات اجتماعیه آرزوی مبرمنی طویانلر ،
عربده اجتماعیه قاریشانلر ، احتراصات سیاسیة و اجتماعیه ايله متحسس ،
اتفاقلرک و اتحادلرک محسناننه معتقد اولانلر ، « یارین » ک یکی و بویوک
برشی کتوره جکنه مطمئن بولنانلر ، بونلرک هپسی بالطبع کندی عالنده
سربحیب مراقبه اولان بر متشکله طرفدار اولمازلر . حیات داخلیه ايله

حرکات اجتماعیہ بربرینی رفع و اخراج ایدر ایکی مفهوم مخالفدر . بوایکی نوع روح بربرینی آکلایامازلر . بوایکی فکر و مسلک طرفدارانک آناری مطالعه ایدیولورسه آزاده کی کردابک نه قدر مدھش وجسم اولدینی تبین ایدر .

معتقدان فوضاویہ نك اوصافك انك باشلیجه سی تحری اولنه حق اولورسه بو اوصافك انك باشلیسی و برنجیسی عقلی و فنی اساسلره استناد ایتسیدر . مارقس فلسفه سنی عادی آنارشیتسنگدن تفریق ایدن اختلافات نه اولورسه اولسون بونلرك هپی ده « بربرینه معاكس اولمغه برابر كچن عصرك نصف اخیرنده حكمرما اولان صوك درجه مسلک عقلی به مستند عین بر فصل روحی اجتماعی بی متمم اولدقلى » تظاهر ایدر . فوضاویونك هپی ده ، عمومیتله ، معلوماتیدر ، و چوق مطالعه ایتش ، فنه صوك درجه متمسكدر . برده عقلی براساسه مستند بر جمعیت تشكیلی خصوصنده فك تلقیناتنه اعتمادی وارددر . فوضاویون فك اعماقنه ، خرده لرینه نفوذ ایده ایده برنوع سكر دماغی به مبتلا اولورلركه بو حال آنلره مدھش قدرت تخیلیه بخش ایدن فكر دیاتی محوایدرك یرینه بر اعتماد و عزم قوی قائم اولور آرتق دنیا به مالك اولورلر ، بر قاچ كچه ایله هر شیئی تخریب و اصلاح حس و قدرتی تحصیل ایدر و ایشته بویله لكه بر فوضاوی كندیخی دنیانك ، بوتون تأسیسات اجتماعیه نك حاكم و آمر یكانه سی عدا ایتكه باشلار . و بوندن تحكیم و استبداد فوضاوی تكون ایدر . بو صورتله منقولات و مدركات فوضاویه صوك درجه متحكم بر استفادہ منجر اولور . بویك مدھشدر . درجه سی نه اولورسه اولسون بویله بر مرتبه عقلی ده آرتق حریت موجود اوله ماز . بونلرك نظر نده حریت اختراع دن عبارتدر ، یكى برشی بولق ، كائناته یكى برشی علاوہ ایتك حق و قدرتیدر . فوضاویون عقله و فنه استناد ایدره ك بر علم و فن مطلقك ، جمعیتی اصلاح ایده جك بر فن عمومینك موجودیتنه قائل اولدیلر و بوتون تشكیلات اجتماعیه بالانلریخی

تعبیرات و اصطلاحات فوضاویه دأرهمنده افاده ایتدیلر . ایلك نظریات-
 شناسان فوضاویه مبهم اولدیغی قدر مدعیانه خلقت عوالم مادیه و علم حیات
 مطالعاتنه مراجعت ایتدیلر . بالخاصه خیالات فوضاویه به دلیل و استنادگاه
 اولق اوزره علم حیاتدن هر وسیله ده استعانه ایدلدی . چونکه علم حیات
 موجودات ذی حیاتده « انتظام داخلنده استقلال » منظره سنی ارأه
 ایتدیکندن بونی جمعیات بشریه ده تحقق ایتدیرمك غایه خیالیه سنی
 بزه تلقین ایلر . ینه علم حیاتدرکه عضویات حیاتیه ده اعضانك وظائفده
 معادلت حادثه سیله بزه فکر مساواتی نفخ و قیاساً بونی عضویات اجتماعییه
 تطبیق فکرینی القا ایدر . و بومطالعات صرهمنده « تسکامل » نظریه سنی ده
 مشکلاتی حل ایتك ایچون امدادیمزه یتیشیر و ایشته بو صورتله فنونك
 ترقیسندن سعادت بشریه نك تحقیق امیدایدیلور . بونلره کوره ترقیات فیه
 و میخانیکیه اویله بر ثروت طاشقنقلری حصوله کتورمشدرکه بوکومه دن
 بر طوتام اخذی انقسام ثروت مسئله سنی حله کفایت ایده ییلور .

مسلك فردیون بالطبع بو خیالات شبه فیه یه اصلا عطف انظارالتفات
 ایتمز . فردیون ایچون فن مطلق یوقدر ؛ آنك نظرنده یالکز فنون ،
 یعنی آز چوق معقول و صحیح اصول تحری و استقصا موجوددر .

بوندن بشقه فردیون مسلك فکر یونه معارضدر زیرا آنلر بوراده
 بر تحکم تهدیدی کورورلر : بایل ، ستاندال ، فوریه کبی فردیون ایسه
 فکرک افعال و حرکات اوزرنده تأثیرینی انکار ایدرلر ؛ دوراندیشلك
 ساحه سنی تحدید ، سربستی و طالعی کندی اراده لرینه منقاد و مفوض عد
 ایدرلر . دوراندیشلك بزه بر طاقم سلاسل تقید احضار ایدر ؛ بزی
 احتیاطی ، قورقاق ، حسابی یاپاز . سیتزر کبی بعض فردیون ایسه حال
 حاضرده کی درجه سربستی بی مدحده اطرا ، علم حکمت اجتماعیه نك
 قاعده لرینی ، قانونلرینی متحکم و مستبد کوره رك آنلردن تحاشی ایدرلر ؛
 اسکی پاپالرك عمومی بر حکومت روحانیه تشکیلی خیالاتنه شبیه اولق

اوزره « برتلو » طرفندن تخیل اولسان برقاچ متفنن وعالمك قدرت
تحكمی نظریه سنه قارشى معترضدرلر. فردیون ، تشکیلات جدیدء اجتماعیه یه
خصمدرلر ، بونلرك وضعیتلری « قانونلرك خصم جاحدی » اولمقدور .
تشکیلات حاضر دینی بوزمقله یرینه نه قویه بیله جگیز ؟ قانون دیمك ،
اصلاح ، تنسیق دیمكدر . تنسیق اولنه حق بشریت ده ائی بر آئی یه
طوغری یورویه حکمی ؟ ایشه بونلر فرط بدینیلری سببیه بونده
متردددرلر : وانقلاباتی ایجاب ایتدیرن تشکیلاته اساساً معارضدرلر .

*
* *

فردیون وفوضاویون آرمه سنده نظری بر نقطه نظرده سرد ایدیلن
فرقلر حقایق ساحه سنده ده بشقه لریخده تولید ایدر .
فردین طرفندن جمعیت مؤسسه یه قارشى توصیه ایدیلن خط حرکت
فوضاویون طرفندن توصیه ایدیلنلردن شایان نظر دقت یردرجه ده فرقلیدر .
فردیون ایچون حل ایدیله جك مسئله بودر : ضروری بر فئالق
اولق اوزره تلقی ایدیلن بر جمعیت داخلنده یاشماق ایچون نه یامیلیدر ؟
بدینی اجتماعینك ایجاب ایتدیردیكى یكانه واساسلى طریق حل اتحار
ویا اورمانلره ، طاغله چكیمكدر . مع مافیه فردیون مسلكنه منسوب
بریسى ، حقلی حقسر ، بو نتیجه دن استنكاف ایدر سه اهمیتجه بوندن ده
آز اساسلى اولمان ، فقط یالکیز تدقیق نتایجنه واصل اولمش ، نسبةً
تالی ، حیات تجربیه نك ایجاباته بنا ایدلمش بر بشقه مسئله نك حلی لزومی
تبارز ایتدیکنددر . بو مسئله شوپنهاور طرفندن ایراد ایدلمشدر . مومى الیه
نظراً اولیه برفه ، صنعته احتیاج واردر كه حیاتی ، ممکن مرتبه ، مسعود
اولدینی قدر خوش کوسترسون ، شوپنهاور بوفه بر اسم مخصوص ده قویمشدر .
مبحث شیاطین لطیفه . Eudémouelogie . شوپنهاور ك حیاتدن استنباط
ایتدیكى معنای عمومی بوفك ویردیكى فكر ایله طبان طبانه متضاددر .
بناءً علیه بحث و ایراد ایده جكى فن جدیدینك نظریاتی حقایق حیاتییه

قارشی برنوع خارجی، سفلی بر فلسفه ایدی که خطایه مستند اولان بوتقاط نظر ضعف بشری و ایجابات حیاتیة تجربیه و علمیه بی مسامحه ایتشدی. « حکمت حقنده قواعد کلیه » نام اثرنده شوپنهاور دیرکه: « بو مسائلی تدقیق ایتم ایچون فلسفه مک اساسی تشکیل ایدن بر قاعده یه کوره حرکت ایتدم، یعنی معنوی، تعقیدی، علوی نقطه نظر لردن تماماً تباعد ایتدم. بناءً علیه بونی تعقیب ایده جک اولان بوتون ایضاحات و استنتاجات بر درجه یه قدر ساحه اجتماعیه ده بر نوع تعمیره استناد ایدیور ایدی. اوصورتله که بر معناد و صورت عادیه ده ضروری قبول ایتدیکمز نقاط نظر لر مزای اخذ ایدرک بونلرک یا کلسقلرینی، خطیه لرینی ده قبول ایدیور ایدی. » و حقیقه فردیون، یعنی بدین اجتماعیون ایچون ده نقطه نظر بالضروره متحکم و تضییق کار اولان حال اجتماعی ایله تألیف ایدیه بیه جک استقلال فردی و حریت شخصیه نک حد اعظمیسی استحصا طریقی بولمقد. بوراده او یله بر مسئله عملیه موضوع بحثدر که ضایه سیاه قیودات اجتماعیه بی ممکن مرتبه کوشه ده جک، جمعیتک فردی قارشی تشکیل ایتدیکی مسائللری رفع ایده جک، و جمعیت حالنده یا سامغه مجبور اولان فردی قابل تحمل بر طرز حیات ونسبی بر حجت سعادت احضار ایده جک بر نتیجه یه وصول اولنسون.

شو حالده فردیونک جمعیت قارشوسنده اخذ ایتدکلری حرکت تعرضیه فوضاویونک قابا و وحشی خط حرکتلرینه نسبتله صوگ درجه غایت مشوش، پک نازک، دهامتنوع ودها آغیردر. — بوراده هر کس کندینه کوره شخصی بر خط حرکت تعیین، جمعیت قارشوسنده بوجالامق، جمعیتدن ممکن مرتبه قاچنمق، کندینی تضییق ایدن آغلردن قور تولقی ایچون ایستدیکی صورتله تدابیر وادویه استعمال، و یا خود یولده ممکن مرتبه جریحه دار اولیه رق کندینی جمعیت طولابلرینه التا ایده بیلور.

مسالك فردیونک بو قواعدی ایکی نقطه یه ارجاع اولنه بیلور: اولاً:

فردی مربوط بولندینی تأثیرات ویا مناسبات اجتماعییه (یعنی تابع بولندینی محیطات اجتماعییه واداریهیه) قارشی حریت خارجیهسنی استحصال؛ ثانیاً کندیسنده استقلال و فردیت حسلرینی تقویه ایده جک وسائط سربستی داخلی ویا حفظالصحه فکریه ومعنویهنی استکمال.

برنجی نقطه نظره وصول ایچون اخلاقیون فردیون مطالعاتندن مستنبط اوله رق بروجه آتی موادی محتوی بر پروغرام یایله بیلور:

(ا) - مناسبات ویا قیودات خارجیه نی اصغری بر حده تنزیل ایتک . بونک ایچون حیاتی ساده لشدیرمک، حریت شخصییه مزدن بر مقدارینی سلب ایده بیله جک اولان هیچ بر قید آلتیه کیرمه مک، هیچ بر کتلیته وهر نه نوع اولورسه اولسون، فرقه لره داخل اولماق . بونظریه ده قارتک نظریه سیدر . «یا لکز قالان نه بد بخت!» قول مشهورینه قارشی کوکس کر مک . بونظریه چوق کره فائده لی و نافع در.

(ب) - اگر استقلال اقتصادینک فقدانی ویا خود دها قوی و تهدید کار تأثیراته قارشی کندمزنی مدافعه احتیاجی بزنی بوقیود آلتیه کیرمه که اجبار ایدرسه کندیمزنی انجیق مشروط و قابل فسخ ویا لکز منفعت خود پرستانه مزک امر وایجاب ایتدیکی نسبتده ربط و بند ایده لم .

(ج) - مؤثراته و قوتلره قارشی : «فرقه یه دوشورکه کندک حر اوله سک» حرکت مدافعه کارینسی استعمال ایتک . مؤثرات و قوای متخالفه ورقیه نی زیر قبضه تصرفنده بولندیرمق ؛ بونلرک رقابتی ادامه ایتک و فرد ایچون هر وقت مهلك اولان اتحادلرینه مانع اولمق ، بعضاً برینه بعضاً دیکرینه استناد ایدرک بونلرک قوتلرینی ازاله یه و بوضووتله بیطرفلقلرینی تأمینیه چالشمق . آمیهل بو حرکت تحفظیه نک منافعی «خاطرات صمیمیه» سنده بروجه آتی ایراد ایدر : «بوتون فرقه لر استبداده، تحکم ادارییه میل ایدرلر، فقط برکت ویرسون، عددرلی چوق اولدیعی ایچون بونلره غلبه ممکن اولور .»

د) بوموازنت اویونی سایه سنده هر هانکی بر قوت آغیر باصار، بر آز فضله اهمیت اکتساب ایدرسه اولوقت طوغریدن طوغریه او، خصم اولور. ایشه بونقطه نظر دن فردیون حکومتک موجودیتی تماماً قبول ایدرلر؛ فقط اولیه برحکومت که ضعیف و موجودیتی انجق افرادی اداره ایده بیله جک درجه دن فضله قوتلی اولسون، موقت و تهدید تحتنده بولسون.

ه) - آنلردن تجرد قابل اولیان بوتون قانونلره، بوتون عادتلره صورت ظاهرده تابع اولق. اجتماعی مقاوله لری آچقندن آچیغه رد وانکارایتمه ک، صو ک درجه ضعیف بوللیدیغی زمان آنره بویونا کمک، غورمونه نظراً فردیون تحکم و حکم اساسی قوت و اقتدارلری نسبتده انکار یعنی تخریب ایدنلردر. بونلر برضرر ایراث ایتیمه جکنی آکلادقلری زمان بوتون قوانین و مقتضیات اجتماعی دن تجرد ایده بیلنلردر. کندی شخصیلرینه تعلق ایتدیکی مرتبه ده حکم و تحکم اساسلری رد و تخریب، مشوش جمعیتلر مزده بر فردک اوله بیله جکی قدر کندیلرخی سربست یابه بیلنلردر. وضعیت سیاسییه متعلق اولان قواعد نظریات آیروجه تدقیق ایدلمکه شایاندر. اساس اعتباریله فردیون اشکال سیاسییه قارشی لاقیدرلر، چونکه آنلر بواشکالک هپسنده معارضدرلر. «وینی» نک «سته للو» نام اثرند - که بواثرک اساسی شاعرایله محارب آره سنده بر مقایسه اجراسیدر - کرک حکومت وحیده الامر، کرک جمهوریت عوام، کرک ژیروندن جمهوریتی؛ شاعری یعنی فردیت عالیه، متفکره و مستقله بی عین صورته رنجیده ایدیور. وستهللو دیور که: «ایمدی بودائی اوستراسیزم [۱] ی کوردیکم کبی

[۱] اوستراسیزم یونانستان قدیمده یک زیاده رأی احراز ایدن مشاهیرک تحکمندن اجتناباً اون سته مدته آتته خارجه نفی ایدلری صورتده جاری اولان قانوندر. بو بایده آرای عمومیه به مراجعت ایدلدیکی زمان رأی مدیه قابوغنه یازمق عادت اولدینی جهته بواصوله «مدیه» دیمک اولان «اوستراقون» کله سندن اشتقاقاً اوستراسیزم دنیلمشدر.

- چونکه شاعر ایستدیکي شکل سیاسي حقنده رأی ویرمکده حق خیار احرار ایزده بیلور - اوچ اشکال سیاسیهدن برنجیسنک بزدن محترز کورونور ، ایکنجیسی بزی فائدهسز عدایدرک تحقیر ایدر ، اوچنجیسی بزدا براز عداوتله برابر فائیت اصیلانه منزی رفع و تسویه ایلر اولدیغنی کوردم . بز عجبا جعیتک دائمی اسیر لیمی یز؟ » « داویدتورو » انتخاباده رأی ویرمکدن امتناع ایدر ، و سیاستی « غیر حقیقی ، اینانناز ، و معناسز » اولق اوزره تصویر ایلر ایدی - مع مافیه فرد بعض احوالده پک مفید بر صورتده سیاسیات ایله اشتغال ایدمه بیه چکی زمانلرده اولور . بوسایهده فرد کندیسنی تضییق ایدن دیگر تأثیرات اجتماعیله مجادله و آنلری مغلوب ایدرک بیطرف بر اقه بیلور . ایشته اوزون سنه لر کرفتاری اولدیغمز بلای استبداد بر طاقم قوای مؤثره اجتماعی ایدی . بونلری احما و تأثیرلرینی ازاله ایچون سیاست مؤثر و الزم ایدی . و آنک ایچون اوصرهده پیشوایان حریت سیاست ایله مشغول اولدیلر ، سیاست مستبده نی ده ویرمکه حصر مساعی ایتدیلر . مقصد حاصل اولدقدن صکره آرتق سیاست بونلر ایچون لزومسز اولمشیدی بر چوقلری برر برر میدان سیاستی ترک ایدرک قوای فردیه لرینی نتیجه یه حصر مساعی ایتدیلر .

مسلك فردیون ، دیگر طرفدن ، هر نوع مسالك سیاسیه قارشى بنقید و آنلردن مجتنب اولدیغنی ایچون ساحه فعلیاتده بو مسلك هپسی ایله ائتلاف و بوتون افکار ایله اتحاد ایدمه بیلور .

فردیون آره سنده بعضلری واردرکه بالخاصه ده موقراسی به قارشى شدتله سنک انداز تعریض اولورلر . برژره کی بعضیلری ایسه ده موقراسی نی - حاکمیت عامه - ترجیح ایدرلر . چونکه ، بونلره کوره ، بوراده بوتون روابط کوشکدر ، بو حال ایسه حکومتی دوچار ضعف ایتمکه برابر افرادی تسلیت و بونلره موضعی تحکملرک مع التأسف احما ایتدیکي بر حریتی و بر نوع سهولت حیاتی استحصال ایدر . ذکر ایتدیگمز اصول و قواعد

خارجیه نك یانی باشنده غایه سی استقلال داخلیمزی محافظه یه معطوف اولان حفظ الصیحه فکریه و اخلاقیه یه عائد بر قاعده اخذ موقع ایدر . بو قاعده بوجه آتی شو بر قاج قواعد فرعیده خلاصه اولنه بیلور :

(ا) - کندی نفسنده رییت اجتماعی ، معلومات اجتماعی و سائر مسلك فردیوندن مستخرج وضعیات فکریه یی تقویه و تمیه ایتک .

(ب) - مقاوله اجتماعی نك ماهیت موقته ، مفروضه و اختیاریه سنك درجه سنی و فرد ایچون اشومقاوله نك محتوی اولدینی افراط تحکمی هر واسطه ایله رفع خصوصنده مسلك فردیتك واسع مقیاسده بر حلال مشکلات اوله جغنی تقدیر ایتک .

(ج) - ده قارتك هولاننده دن بحث ایدرکن ایراد ایتش اولدینی شو « انسانلر آردهنده ، کویا بونلر بر آخاج ایتش کی کزنیورم » نظریه سنی تفکر و ملاحظه ایتک . یعنی جمعیتدن بر استنادگاه قوی بکله میهرک و بونی جمادات منزله سنه تنزیل ایدرک تمیه ذاته چالشمق .

(د) - وینی نك « حیات شاعرانه یی حیات سیاسیهدن تفریق ایتک » « نظریه سنی تطبیق ایلکدرکه بوده حیات حقیقیه یی ، حیات فکریه و وحسیه یی حیات خارجیه و اجتماعیهدن تفریق دیمکدر .

(ه) - « فوریه » نك شو ایکی قاعده سنی ، « شبهه حقیقیه » (مدنیت حقنده) ، و « انحراف قطعی » (طریق ماضی و عنعیده) نظریه لرینی تطبیق ایتک .

(و) - « کرک افعالنده ، کرک افکارنده کندی سنی اصلا ماضیه زنجیربند تقید قیلماق » یولنده « امرسون » ک توصیه کرده سی اولان قاعده یی درپیش تفکر ایتک .

(ز) - بونك ایچون تأثیرات اجتماعی معتاده دن رهایاب اولمق ، تبلرات اجتماعیهدن قاجق ایچون هیچ بروسيله یی فوت ایتهمك . اك عادی تجربله بو قاعده نك لزومی اثبات ایدر . بزی مسكنلکیله ، اوافق تقید لريله ،

اوافق تهلکه و اوافق خصوصتلیله احاطه و تعذیب ایدن طار بر محیطده
اوزون برمدت یاشادقندن صکره قیصه برغیوبت، قیصه برسیاحت کی بزه
کندی کندیمزی بیلدیرن، طانیدان برشی اولاماز، ایشته اولوقت انسان
خبری اولمدینی حالدده جمعیت طرفندن نه درجه تسخیر و تانیس ایدلمش
اولدیغنی حس ایدر. بوندن صکره کوزلر حقیقتی کورر، بین صافی
وتازه فکرلر ایله مشبوع اولور. کندیسینی بودرجه مسخر ایدن جمعیتک
اغفالاتندن رهایاب اولور سیاحت ایدیه مسه بیه فکر آ کندی کندیسینی
خیالاً بر بویوک سیاح ایله برابر بولندیرمق ممکندر. «پالانت» دیرکه :
«برخسته دوست بیلورم که اوافق و فنا شهرلرده، بر طاقم او هام و خیالات
ایله محاط اولدینی حالدده بیه سیاحت اثرلرینی اوقویه رق بی انتهابر حس
مسرت و سربستی طویار، هه نك اثرلرینی اوقومقله برابر عالم مسراتدن
اوچار، اسکی محیط کندیسینی ایچون زائل اولور ایدی .»

*
* *

اڭ نهایت فردیون و فوضاویونك استقبال محتملی حقنده برقچ سوز
سویلهلم .

حال حاضرده مسلك فوضاویون ، كرك برنظریه اعتباریله ، كرك بر
فرقه اعتباریله حالت تفسیح و انحلاله كرفتار اولمش كچی كوریلیور .
فوضاویون اردوسنك فراریمی و مسلكنك تاركی اولان «لوران تالهاد»
كدر واستمزا ایله قاریشیق بر صورتده بوتفسخك فرقه وارمیشدی .
بوانفساخك سببی یوقاروده ذكر ایتدیكمز صمیمی تضادده مشهود اولور .
بوده فوضاویونك تألیف ایده جككریخی ادعا ایتدكری ایکی اساس آرهنده کی
تضاد و مبايتدر : اساس فردی و یا سربستی ایله ساحه اقتصادیده قومونیزم
ایله ترجمه و تحقق ایتدیریلن اساس انسانی و یا تعاونی حتی مسلك
فوضاویونك تكاملی سببیله بواکی اساس افتراقه مهیا بوخاله كیتدكجه میل
ایدیورلر . برطاقم فوضاویون عننده (باخصوص فكریونی نزدنده)

مسلك فوضانك آز چوق ظاهر بر صورتده عادى وصافى بر مسلك فردى،
يعنى اصل فوضادن پك چوق فرقلى ولدى الحاجه مسلك فوضاوينك
املكرده سى اولان غايه خياليه دن بوسبوتون متباعد تأسيسات سياسيه ايله
ائتلافه مياال بروضعت فكريه اخذ ايتديكنى كوره بيلورز . عددى ده
زياده اولان ديكر مسلك فوضاويه ايسه ، باخصوص حيات ماديه و مؤسسات
اقتصاديه مسائلنى برنجى درجه ده عدايدن مسلكلى، مسلك فردينك
اهميتى اسقاط وبونى برنوع هوسات و آمال زادكانپرستيدن وغير قابل
تحمل بر خود پرستلكدن عبارت اولديغى بيانيله اتهم ايدرلر . بونلك
مسلك فوضاويلرى مسلك اشتراكينك صوك درجه سنه و مسلك فردى ايله
اصلا مناسبته دار اوليان برنوع اشتراك اموال انسانيتپرورى و مساواتپرورى به
منجر اولور . بوضورتله مسلك فوضاويده اساسلرده و ميلانلرده بر مبانيت
حاصل اولور كه بو ، تفسخ ايچون منحوس بر تخم تشكيل ايدر .

تعريف ايتديكمز يولده كى مسلك فرديون - كه تضيقات
اجتماعيه قارشى عصيان حسى ، « بن » لرى برلشدير مك حسى ،
هر حال اجتماعيده فردايله جمعيت آره سنده بالضروره تكون ايدن مبانيت حسى ،
بدينى واجتماعى صورتنده خلاصه ايتمشيدك - ايشته بومسلك فرديون
معاصرينك روخذن محو وزائل اوليور كى كوروليوور . بو مسلك ازمنه
اخيره ده بر چوق طرفدار و ظهير بولمشدر كه بونلك صدای مؤثرلى
دها اوزون مدتلى حریت و استقلال مفتونى اولان قلوبلرده برر معكس
بوله جقدر . مسلك فرديون ، فوضاويون كى موقت وضعى بر مسلك
سياسى تعقيب ايتمز . بو مسلكك مخلد اولسلك اسبابى ، اسباب اجتماعيه دن
زياده اسباب روحيه استناد ايدر . نيكيين بعض سوسولوجارك بيانات
كاهناه لرينه رغماً - كه بونلك تكامل اجتماعينك جهت سيزى و تماميت
اجتماعيه قانونى كى بعض قوانين عاديّه اجتماعيه نك تاثيرات ميخانيكيه سى
سبيله تكامل بشرينك آز چوق اوزاق بر مستقبليه انساقيات بشره ينى

کاملاً عقلی و عمومی بر حاله افراغ ایلجه جکنه بوتون روحلری تشابهه، مساواته و انسیته سوق ایده جکنه، فردی کتلیت داخلنده غرق و افنا، آنده کی هر حس فردی بی استقلال و قوانین محترعه عقلیه و اخلاقیه یه مقاومت طرفی ازاله و تسکین واک نهایت «لوقونت ده لیل» ک دیدیکی کبی «بختیار قورقاقلر» دورینی حلول ایتدیره جکنه معتقددرلر. مسلك فردیونک حساسیت بشریه نك بر شکل دائمی و ناقابل زوال اوله رق باقی قاله جغنه و بو مسلكك جمعیت ایله برابر پایدار اوله جغنه اعتقاد ایتک اقتضا ایدیور.

ذاتاً فوضاوی تحکم و استبدادك الك زیاده حکمرانی اولدینی بر مملکتده روسیه ده، غدای اصلینی آلمسی دالتیه آکلاشیلور که محروم حریت اولان فکرلر ساحه فعلیاتده کوره مدکلی سربستی و حریتی خیالاً بنیاد ایده ایده بشرک تأسیسات موجوده سنی افنا و بوندن بوتون تأسیسات اجتماعی بی مسئول عد ایده جک بر نقطه یه واصل اولیورلر. حریت پیشوا سی اولان انکلترده عمله نك سفالتی افکار اشتراکیه یی تمیه یه سبب اوله بیلور؛ فقط مسلك فوضاوی بوراده تأسس ایتمه مشدر، بوندن صکرده دیکیش طوتدیره ماز، فوضاویونک الك زیاده اجرای فعالیت ایتدکلی دوره روسیه نك شدتلی بر استبداد آلتنده زبون اولدینی زمانه مصادفدر.

دیمک که حریتك افراطندن سوء تلقیسندن تگون ایدن مسلك فوضاوی، عکس صورته ده، یعنی حریتك فقدانندن، تضییقات اجتماعیه دن ده نشئت ایده بیلور. و بر چوق مسئله لرده اولدینی کبی بوراده ده ایکی غایه، ایکی مابین سبب هدفده عین نتیجه یه ایصال ایدیور و مسائل اجتماعیه نك معاقبتی، مشوشیتی تولید و تزید ایدن اسبابک بریسی ده بوکی منبرلری متخالف ایکی سببک عین بر نتیجه یه، عین بر غایه یه منصب اولسی کیفیتی تشکیل ایدر.

ادرنه ۱۲ مایس سنه ۳۲۶

برایع نوری